



Inatsisartunut ilaasortaq Isak Johannesen

**Sulinermit isertitat ilassutaasut akileraaruserneqarnerannut tunngatillugu § 37
naapertorlugu apeqqutip 2026/131-p akineqarnera**

Apeqqutit ataani allassimasut akissutaat matumuuna nassiunneqarput.

Taaguut *sulinermit isertitat ilassutaasut akileraaruserneqarnerat* akileraartarnermi inatsimmi taaguutitut atorineqanngilaq. Akissummi matumani aperisup apeqqummut tunngavilersuina aallaavigineqarpoq, tamannalu tunngavigalugu *sulinermit isertitat ilassutaasut akileraaruserneqarnerat* nalinginnaasumik sulinerup avataanit isertitatut paasineqarput. (i) qaangiuttoorluni sulineq pineqarpoq, tassa imaappoq tassani sulisitsisumi piffissaq suliffiususaaq nalinginnaasooq qaangerlugu sulinermit akunnermut akiliineq imaluunniit piffissamut suliffiususaaq isumaqatigiissutigineqartumut akiliineq, aamma (ii) saniatigut sulinermit isertitat pineqarput, tassa imaappoq pingaarnertut suliffiup saniatigut sulinermit aningaasarsiatigut isertitat.

Allakkat ullulernerqarfiat: 27-07-
2026
Suliap nr. 2026 - 13756
Akt id. 26687138

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

**Apeqqut 1) Naalakkersuisut misissorsimavaat, sulinermit isertitat ilassutaasut
akileraaruserneqarnerisa oqilisaaffigineqarnerat Kalaallit Nunaanni sulinissamut
neqeroorutaasartunut qanoq sunniuteqassanersoq?**

Saniatigut sulinermit isertitat akileraaruserneqarnerisa oqilisaaffigineqarnerat nunatsinni sulinissamut kajumissutsimut qanoq sunniuteqarnissaannut tunngatillugu misissueqqissaartoqarsimanngilaq.

Apeqquteqartup nammineerluni eqqaasaatut nunani allani misissueqqissaarnerit misilittakkallu sunniutaasussatut naatsorsuutigineqartut paasinissaannut iluaqutaasinnaapput. Inernerilli nunamit nunamut mianersorluni tamatigut atorineqartassapput. Apeqqutip 4-p akineqarnerani nunanit allanit assigiinngitsunit misilittakkat nassuiarneqarput.

Saniatigut sulinermit isertitat akileraaruserneqarnerisa oqilisaaffigineqarnerat nunatsinni sulinissamut kajumissutsimut qanoq sunniuteqarnissaannut tunngatillugu misissueqqissaarnissaq ajornakusoortorujussuusaaq. Saniatigut sulinermit isertitat aamma qaangiuttoorluni sulineq - isertitat nalunaarsorsimaffianni nalinginnaasumik aningaasarsiatigut isertitanit - immikkut nalunaarsorneqanngillat, taamaammallu saniatigut sulinerup annertussusaanik missiliuinissamut paasissutissanut tunngavissaqanngilaq. Aaqqissuusseqqinnermik naammassineqarsimasumik misissueqqissaarsinnaanissaq tutsuiginartumik nalilersuinissamut piumasaqaataavoq, tamannali naammassineqarsimanngilaq. Taamaammattunngavigineqartut aallaavigalugit maani nunatsinni pissutsinut naleqqussaalluni nunani tamalaani ilisimatusarneq tunngavigalugu sunniutaasinnaasunik nalilersuinissaq tulluurtutuaassaaq.

**Apeqqut 2) Sulinermit isertitat ilassutaasut nalinginnaasumik sulinermit isertitanit
appasinnerusumik akileraaruserneqartalernissaannik aaqqissuusaaqarnermi,
akileraarutitigut isertitassat qanoq annaaneqartiginissaat Naalakkersuisunit
nalilerneqarpa?**

Isertitassatut annaasassat Aningaasaqarnermut Naalakkersuisoqarfimmit naatsorsorneqarsimanngillat. Ilaatigut apeqqut 1-imut akissummi tamanna nassuiarneqarpoq, ilaatigullu aaqqissuussinerup ilusilersorneqarnera isertitassatut annaasaqaataasussanut apeqqutaalluinnarumaarpoq. Taamaattorli iluanaarutissatut annaasaqarnermut suut pissutaasinnaanersut qularnanngitsumillu annaasassat sooq taama annertutiginnaanersut nassuiarneqarsinnaapput.

Saniatigut sulinermit isertitat akileraaruserneqarnerannik appaaneq qularnanngilluinnartumik toqqaannartumik iluanaarutissat sunnerneqassapput, tassa Namminersorlutik Oqartussat kommunillu siunissami sulinermit akileraarutissanut annikinnerusumik akileeqquisalertussaassammata. Akileraarutini appaaneq apeqqutaalluni tamanna malunnartumik isertitassatut annaasaqarnermik kinguneqarsinnaapput, tassami sulinermit isertitat akileraaruserneqarnerat ataatsimut akileraarutitigut isertitanut pingaarnerpaammata.

Taamaattorli akileraarutini appaaneq ilaatigut sulinissamut kajumissaarinikkut sulisoqarnerulerneranik kinguneqarsinnaavoq, tamannalu isertitassatut annaasaqannginnissamut iluaqutaasinnaalluni – tamannali assut qularnartutut nalilerneqarpoq. Nunani tamalaani ilisimatusarnerni arlalinni – saniatigut sulinermit isertitat akileraaruserneqarnerannik oqilisaanikkut malunnartumik sulisoqarnerulerneranik – uppersaatinik nassaartoqarsimanngilaq, tamannalu apeqqummi 4-mi itisilerneqarpoq. Nunatsinni saniatigut sulinermit tamakkiisumik akileraarnerq nunanut allanut sanilliullugu appasinnerussaaq, tassami akissarsiaqqortunerit immikkut akileraaruserneqarnerq ajormata. Nunat aaqqissuussinernik misilittaaffigineqarsimasut eqqarsaatigalugit suliniut killilimmik suliffeqarnermut sunniuteqarniarpasippoq. Tamanna apeqqut 3-mi itisilerneqarpoq.

Saniatigut sulinermit isertitat akileraartarnermut inatsimmi qanoq nassuiarneqarnersut apeqqutaalluni isertitat iluaqutaasumik akileraaruserneqassappata, innuttaasut sulisitsisullu inatsimmi killiliussat tunngavigalugit nalinginnaasumik isertitaminnik saniatigut isertitamittut nalunaarsueriarnissaat naatsorsuutigineqartariaqarpoq. Taamatut allatut nalunaarsuinikkut sulinerunngikkaluarluni isertitassatut annaasassat annerulersinneqassapput, tamatumalu saniatigut nakkutilliinissamut allaffissornissamullu annerusunik aningaasartuuteqartoqalernissaa naatsorsuutigineqartariaqarpoq.

Paasissutissat tunngavigineqartut aallaavigalugit qularnanngitsumik ingerlaannaq isertitassatut annaasaqartoqassasoq ilimanarnerpaatut nalilerneqarpoq, illuatungaani sulinissamut kajumissuseq naliigiissitsisussaq qularnarpoq. Suliassaqaarfimmut tunngatillugu ilisimatusarnikkut misissuinerit killeqarput, taamaattorli sulinissamut kajumissutsip annikinnissaa ilimanarpoq.

Aningaasatigut kingunerisassat saniatigut taamatut suliniuteqarnerq naapertuilluartuliornersorpeqquserneqarsinnaavoq. Inuit marluk assigiimmiq ataatsimut sulinermit isertitalit isertitaasa katitigaanerit pissutigalugu assigiinngitsumik akileraaruserneqarsinnaapput, tamannalu naapertuutinnilaq.

Apeqqut 3) Naalakkersuisut naliliippat taamaattumik akileraarusiinermut aaqqissuussineq pisortat namminersortullu sulisoqarniarnikkut

amigartoornerannik annikillisaanermut iluaqutaasinnaasoq? Aappiuppat, qanoq ililluni?


Saniatigut sulinermit isertitat akileraaruserneqarnerisa oqilisaaffigineqarnerat nunatsinni sulisussaaleqinermit killilimmik sunniuteqarnissaat Aningaasaqarnermut Naalakkersuisoqarfimmit nalilerneqarpoq.

Teori eqqarsaatigalugu saniatigut sulinermit isertitat appasinnerusumik akileraaruserneqarnerat ataatsimut isigalugu sulerusussuseqarneq sulinissamullu kajumissuseq eqqarsaatigalugit akерleriimmik sunniuteqarsinnaavoq. Illuatungaani akileraarutit appasinnerat pissutigalugu akileraaruseereerluni akunnermut akissarsiat qaffasinnerussapput tamannalu sulinerunissamut kajumissutsimut (substitutionseffekten) iluaqutaassaaq. Aappaani appasinnerusumik akileraartarneq akileraarnerup kingorna sulinerup assinganut qaffasinnerusumik isertitaqarnermik kinguneqarsinnaavoq. Taamatut isertitaqarneruneq ilaatigut sunngiffimmut atornerqarnerulersinnaavoq taamaalillunilu sulinikinnerulertoqarsinnaalluni (indkomsteffekten). Akileraartarnermik oqilisaassineq sulinissamut kajumissutsimut tunngatillugu akерleriimmik sunniuteqassaaq, taakkunanilu sunniutini sorleq sunniuteqarnerpaassanersoq apeqqutaassaaq. Inummit inummut assigiinngiaassaaq aamma pissutsit assigiinngitsut apeqqutaassapput.

Nunatsinni qaffasinnerusumik isertitalit nunanut allanut sanilliuffigisartakkatsinnut sanilliullugit isertitaminnut appasissumik akileraartareerput. Nunarpassuarni akissarsiaqqortunerit immikkut akileraaruserneqarnerat pissutigalugu saniatigut isertitat nalinginnaasumik isertitanut sanilliullugit tamakkiisumik akileraaruserneqartarput. Tamannali nunatsinni atuutinngilaq, *takussutissiaq 1 takuuk*. Saniatigut sulinermit akileraartarnikkut artukkiinermit aqqissuussineq iluaqutaasinnaasoq nunanut allanut sanilliullugu nunatsinni ilaannakortumik pioreerpoq. Aatsaat ukiumut isertitat 160.000 kr.-t qaangerpagit sulinermit isertitat 42-44 pct.-imik akileraaruserneqassapput. Taamaattoorli 250.000 kr.-nit 500.000 kr.-t akornanni isertitaqaruit akileraarut tamakkiisoq 48 pct.-t missaannut qaffassaaq. Tamatumani sulinermit ilanngaatiq annikilliarternara pissutaavoq: koruuninik isertitaqarnerusoqartillugu ilanngaatiq 6 oorit missaannik annikillineqartarpoq, taamaalilluni isertitanit annertunerulaartut akileraarutigineqartussaapput. 2025-mi Danmarkimi 60 pct.-imik qaffasinnerpaamik tamakkiisumik akileraaruteqartoqassaaq, Frankrigimi 55 pct., Canadami 54 pct., Sverigemi 52 pct., Islandimi 46 pct., USA-milu 44 pct¹. Nunatsinni saniatigut sulinermit akileraarut appasereermat nunani allani akissarsiaqqortunerit qaffasinnerusumik akileraartarnerannut sanilliullugu oqilisaassineq sulinissamut kajumissutsimut sulerusussuseq annikinnerulissasoq naatsorsuutigineqarpoq.

¹ OECD Tax Database, "Personal income tax (PIT) – top statutory and marginal tax rate" (paasisutissat 2025-meersut).

Takussutissiaq 1: Ukiumut isertitat apeqqutaallutik tamakkiisumik akileraarusiisoqartarpoq (2026-meersut)



Oqaas.: Akileraarut tamakkiisoq takussutissiami takutinneqarpoq, tassa imaappoq akileraarutit angissusia, ilanngaak aalajangersimasooq, inummuk ilanngaak aamma sulinermit ilanngaammik iluarsiinerit eqqarsaatigalugit koruunit isertinneqartut qanoq annertutigisumik akileraaruserneqarnersut takutinneqarput. 42 pct.-imik akileraameq (kommunit akornanni assigiinngiiaarpoq) takussutissiami atornerarpoq. Sulinermit ilanngaak 70.000 kr.-nit 160.000 kr.-nut qaffakkiartortarpoq (akissarsiat 100 kr.-mik qaffakkaangata sulinermit ilanngaak 17,5 kr.-mik qaffattarpoq). Sulinermit ilanngaak 250.000 kr.-nit appariartuartaarpoq, 500.000 kr.-t anguneqaraangata unittarpoq (akissarsiat 100 kr.-mik qaffakkaangata sulinermit ilanngaak 6,3 kr.-mik appariartortarpoq).

Tigus: Aningaasarsianit akileraarutit pillugit Inatsisartut inatsisaat pillugu Namminersorlutik Oqartussat inatsimmut nalunaarutaat namminerlu naatsorsukkat.

Tamatuma saniatigut nunatsinni suliffissaaleqisut ikitsuinnaapput, aamma nunani avannarlerni sapaatip akunneranut akunnerit suliffiusartut qaffasinnerupput. Tamanna akileraartarnermik oqilisaassinikkut annerusumik sulisoqarnissaanut atugassarititaasut pitsaanngillat.

Kiisalu saniatigut sulinermit isertitat akileraaruserneqarnerannik oqilisaaneq annerusumik naliiginninnermik pilersitsisinnaavoq. Saniatigut sulinermit isertitalit nalinginnaasumik isertitalinnit akileraaruserneqarnerat oqilisaassiffigineqarpat inuit suleruluttartut isertitaqarnerukkajuttartullu agguaqatigiissillugu appasinnerusumik akileraassapput. Sulinissamut nukissallit saniatigullu sulinissamut periarfissallit tamanna iluaqutigissavaat, innuttaasulli saniatigut sulisinnaannigisut oqilisaanneqarneq iluaqutigissannigilaat.

Apeqquut 4) Naalakkersuisut nunani allani imaluunniit namminersorlutik oqartussaafillinni aaqqissuussinerit assingusut, sulinermit isertitat ilassutaasut imaluunniit suliffissamik sivitsuineq appasinnerusumik akileraaruserneqartarlutik, misissorlugit nalilersorsimavaat? Aappiuppat, qanoq misilittagaqarfigineqarpat?

Nunani allani aaqqissuussinerit ataasiakkaat, tassani qaangiuttoorluni sulisartut imaluunniit saniatigut sulinermit isertitalit akileraaruserneqarnerannik oqilisaassiffigineqartut Aningaasaqarnermut Naalakkersuisoqarfiimmit ilisimaneqarput.

Suliassaqarfiup ilaannakortumik misissorneqarnerata ataani allaaserineqarnera, aamma sukumiisumik misissuisoqannginnera erseqqissaatigineqassaaq. Ilaatigut Frankrigimi, Belgiami aamma Italiami aqqissuussinerit kiisalu USA-mi aqqissuussinerit nunamut tamarmut atuuttut nutaanerusut paasineqarput. Aqqissuussinerit assigiinngeqisumik ilusilersorneqarsimapput.

Sunniutitik nalilersuineq sukumiinerpaaq ilisimatusartunit allanit misissorneqarsimasoq franskit aqqissuussaanaaraat, taannalu 2007-imeersuuvoq, tassani qaangiuttoorlutik sulisut (tassa imaappoq sapaatip akunneranut suliffiusumi akunnerit 35-t suliffiusussatut inatsisitigut aalajangersarneqarsimasut qaangerlugit) aningaasarsianit akileraaruteqarneq ajorput aamma isumaginninnermut tunngasunut tapiissutitik annertuumik akiliuteqarneq ajorput. Piffissaq suliffiusoq malunnaatilimmik sivitsunngitsoq nalilersuineri paasineqarpoq, taamaattoorli qaangiuttoorluni sulineri malunnaarsuisarneq qaffariarsimasoq paasineqarluni. Qaangiuttoorluni sulineri akunnerit suliffigineqartutut malunnaarsorneqarsimasuni ilaatigut sulisartut qaffasissumik piginnaasallit amerlanerpaasimapput, taakku piffissaq suliffigisaat eqqoqqissaartoq nakkutigiuminaappoq, aamma nalinginnaasumik sulinerup qaangiuttoorluni sulinertut malunnaarsornissaannut periarfissarissaanerupput. Allatut malunnaarsuisoqarnissaanut akileraarutitigullu atorluaasoqarsinnaanerannullu aarlerinaateqarnera inernerit ersersippaat. 2008-mi aqqissuussineri isertitassatut annaasat 4,4 mia. euro missaanniipput, *malunnaarsuiffik 1 takuuk*.

Tamatuma saniatigut aqqissuussisoqarsimavoq nalilersuisoqarsimallunilu, tassani pingaarnertut suliffiup saniatigut sulineq appasinnerusumik akileraaruserneqartarpoq. Belgiami flexi-job iluaqutigalugu inuit minnerpaamik 4/5-mik sulisartut (imaluunniit soraarninngorsimasut) suliassaqarfinni aalajangersimasuni saniatigut suliffeqarnissaminut periarfissaqarput, tassani isertitat eqqarsaatigalugit sulisartup tapiissutaanut aamma aningaasarsianit akileraarutitut akiliineq ajorput. Peqataasut saniatigut suliffillit qaffariaataat annikinnerusoq piffissallu ilaannaani saniatigut suliffeqartarnerat flexi-jobinik nalilersuineri paasineqarpoq, tamatumali peqatigisaanik nalinginnaasumik suliffillit ikileriaateqarsimapput, *malunnaarsuiffik 1 takuuk*.

Nunani allani aqqissuussinerit amerlanerit sunniutitik nalilersuinerit sukumiisumik, aamma ilisimatusartunit allanit misissorneqartunik nalilersuisoqarsimanngilaq. Misilittakkat tunngavigalugit saniatigut sulinerit isertitat akileraaruserneqarnerisa oqilisaassiffigineqarnerat ataatsimut isigalugu sulinissamut kajumissuseqarnerulersitsinissaanik isummerluni inerniliinissamut qularnaatsumik tunngavissaqanngilaq. Akissarsiat nalinginnaasut qaangiuttoorluni sulinertut malunnaarsorneqarnissaannut aarlerinaateqarnera kiisalu akileraarutitigut iluaquteqarnissaq siunertaralugu nalinginnaasumik suliffeqarnermit saniatigut suliffeqalernerit allannngortitsisoqarnissaanut aarlerinaateqarnera misilittakkani uppersarneqarsinnaasuni ersersinneqarpoq.

Aqqissuussinerit assigiinngitsut malunnaarsuiffimmi ataaniittumi nassuiarneqarput, tassani saniatigut sulinerit isertitallit, qaangiuttoorlutik sulisartut imaluunniit saniatigut suliffillit akileraaruserneqarnerat oqilisaassiffigineqarput.

Nalunaarsuiffik 1: Aaqqissuussinerit assigiinngitsut eqikkarnarat, tassani saniatigut sulinnermit isertitat, qaangiuttoorluni sulinerup saniatigulluunniit suliffiup akileraaruserneqarnerat oqilisaassiffigineqarput

Nassuiarnera	Sunniutaa	Nalilernerera
Frankrig 2007 – TEPA-mik aaqqissuusseqqineq Qaangiuttoorluni sulinnermi akunnemut akissarsiat 1. oktobari 2007-imeersut (sap.ak. 35 tiimit suliffiusartussatut inatsisitigut aalajangersarneqarsimasut qaangerlugit tiimit, taakku 25%-imik tapeqqakkajuttarput) aningaasarsianit akileraarutigineqartussaannigillat aamma isumaginninnermut tunngasunut tapiissutinik annertuumik akiliuteqarneq ajorput, aamma sulisitsisoq annikinnerusumik tapiissutinut akiliisarpoq. Aaqqissuussineq siamasissumik atuuttoq 2012-imi atorunnaarsinneqarpoq. Killeqarnerusumik akileraartussaaneq 2019-imi atuutiserseqqinneqarpoq kingusinnerusukkullu annertusineqarluni (2022-mit annerpaamik ukiumut 7.500 euro	Qaangiuttoorluni sulinnerut akunnerit nalunaarutigineqarsimasut qaffariarsimasut aaqqissuusseqqinnermik nalilersuinnermi paasineqarpoq, taamaattorli akunnerit suliffiusut malunnartumik allanngornerannik takussutissaqanngilaq. Sulisartut pineqartut sivisunerusumik suliningikkaluarlutik isertitaat atoriaannaat qaffariarput. Qaangiuttoorluni sulinnermi akunnerit suliffigineqartutut nalunaarsorneqarsimasuni ilaatigut sulisartut qaffasissumik piginnaasallit amerlanerpaasimapput, taakku piffissaq suliffigisaat nakkutigiuminaappoq, aamma nalinginnaasumik sulinerup qaangiuttoorluni sulinnerut nalunaarsornissaannut periarfissarissaannerupput. Allatut nalunaarsuisoqarnissaanut akileraarutigullu atorluaasoqarsinnaanerannullu aarlerinaateqarnera inernerit ersersippaat. 2008-mi isertitassatut annaasat 4,4 mia. eurot miss. naatsorsomeqarput.	Cahuc aamma Carcillo (2014) aaqqissuusseqqinnermik difference-in-differences-imik taaneqartumik nalilersuisimapput. Nunat killeqarfiini sulisartut (taamaammallu aaqqissuusseqqinnermi ilaannigillat) killeqarfiup eqqaani, kisianni Frankrigimi sulisartunut saniliullugit (aaqqissuusseqqinnermi ilaasut) akunnerit suliffigisartagaasa allanngoriatornerannik saniliussipput. <i>Cahuc, P. & Carcillo, S. (2014): "The Detaxation of Overtime Hours: Lessons from the French Experiment"</i>
Italia 2008 – qaangiuttoorluni sulinnermut 10 pct.-inik immikkut akileraarusiigallarneq 2008-mi Italiامي juulimit decembarimut namminersorluni atorfilinnut aaqqissuussinnermik atuutilersitsigallarsimapput, tassani qaangiuttoorluni sulisunut akiliutit naammassisaqarlualernemullu akissarsiat 10 pct.-imik akileraaruserneqartarput. Akileraarutigut annerpaamik ilanngaatigineqarsinnaasut ukiumut 3.000 europput, aamma aaqqissuussineq ukiup siuliani 30.000 eurot ataallugit sulinnermit isertitaqarsimasunut atuuppoq.	Sunniutinik nalilersuineq tunngaviginagu sunniutinik naatsorsuinikkut naatsorsuisoqarpoq. 1,4 mia. euronik isertitassatut annaasaqartoqarnissaa aamma akileraartartumut ataatsimut 85 eurot missaannik akileraarutigut sipaartoqarnissaa naatsorsuutigineqarsimavoq. Naatsorsuinerup kingunerisaanik naligiinnginneq annikinnerusumik qaffariaateqarpoq (Gini-koefficient 0,1 procentpointit miss. qaffariarpoq). Pingaartumik sulisartut aalajaatsut aamma akileraarummik tamakkiisumik akiliisartut tamanna iluaqutigivaat.	D'Amuri aamma Marino (2008) Italiامي qitiusumik aningaaserivimmi illoqutigiit aningaasaqarnerannik misissuineq 2006-imeersoq tunngavigalugu aningaasaqarnermut naatsorsueriaaseq atorlugu naatsorsuipput. Aaqqissuussineq naammassineqarpat akileraarutitik akiliisarneq isertitalu agguarnerat qanoq allanngussanersut naatsorsorpaat. Taamaammatt iluanaarutissat sunnerneqarnerat iluaqutissanik agguaaaneq misissuinnermi erseqqissarneqarsinnaapput, taamaattorli aaqqissuussinnerup sulinnissamut kajumissutsimut pissutaa erseqqissarneqanngilaq. <i>Francesco D'Amuri & Maria Rosaria Marino, 2008. "The Reduction of Overtime Income Taxation in Italy: a Preliminary Assessment,"</i>
Alabama 2024 – qaangiuttoorluni sulinnermit akissarsiat naalagaaffimmit naalagaaffeqatigiinni ilaasumit akileraaruserneqartussaanniginnerat 1. januaari 2024-mit sap.ak. akunnerit 40-t qaangerlugit sulinnermit akissarsiat naalagaaffimmit naalagaaffeqatigiinni ilaasumit akileraaruserneqartussaannigillat. 1. oktobari 2024-mit piffissamut suliffiusumut malittarisassanut nunamut tamarmut atuuttunut (FLSA) naleqqussarneqarput. Aaqqissuussineq 30. juuni 2025 atorunnaarpoq. Aallaqqaammut ukiumut 34 mio. dollarit isertitassatut missingemeqarsimapput, kisianni piffissami 2024-mi januaarimit septembarimut 230,7 mio. dollarit isertitassatut annaaneqarsimasut nalunaarutigineqartunit ersersinneqarpoq.	Naalagaaffik naalagaaffeqatigiinni ilaasoq sulisitsisut qaangiuttoorluni sulinnerut akiliuteqarsimanerannut paasissutissanik pissarsisinnaanngitsvoq, taamaammallu killilimmik tunngaveqarluni missiliuisimasvoq Legislative Services Agency, aallaqqaammulli missingersuisimasvoq kingusinnerusukkut ilisimatitsivoq. Aaqqissuusseqqinneq aatsaat atuutilermat sulisitsisut qaangiuttoorluni sulinnermut akissarsiat akileraaruserneqarsimanngitsut sulisullu pineqartut amerlassusiisa nalunaarutiginnissaannut pissaaffeqalerput. Isertitat nalunaarsorsimaffianni akissarsiat nalinginnaasut qaangiuttoorluni sulineq immikkoortinneqanngikkaangata iluanaarutissat kukkusumik naatsorsorneqarsinnaanerat misiliittakkanit erserpoq.	Aaqqissuussinnerup qanoq sunniuteqarnissaanik nalilersuisoqarsimanngilaq, aaqqissuussinnerup pissutigalugu sulisut akunnerni amerlanerusuni sulilersimanerannut uppermarsaatissaqanngilaq. <i>Provenutal og indberetningsdata: Alabama Department of Revenue, "Overtime Exemption" (revenue.alabama.gov). Oprindeligt provenuskøn: Legislative Services Agency, fiscal note til HB 217 (2023). Vurderingen af årsagen til fejlskønnet er fremsat af Legislative Services Agency.</i>
Belgia 2015 – flexi-jobs Inuk minnerpaamik piffissaq tamakkerlugu suliffiusussamut saniliullugu sivikinnerpaamik 4/5-imik atorfeqareersoq (soraarninngorsimasorluunniit) suliffimmi saniatigut suliffeqarsinnaavoq. Akissarsiat aningaasarsianit akileraaruserneqarneq ajorput nalinginnaasumillu sulisartup tapiissutaanut akiliutigineqarneq ajorlutik, sulsitsisorli aalajangersimasumik tapiissutinut akiliisassaaq.	Aaqqissuussineq 2015-imi akunnittarfiutillinnut neriniartarfiutillinnullu atuutilerpoq, taamanimiilli soraarnemut (2018) suliffeqarfinnnullu allanut (2024-p tungaanut) atuutilersinneqarsimavoq. Fleximik sulisut 10.500-t miss. (2016) 184.000-t miss. (2024) amerleriarput. Aaqqissuussineq suliffeqarfinnit killilimmik sulit atornerqarpoq (sulisartut 1 pct.-iisa miss.). Inuit akunnittarfinni neriniartarfinnillu sulisut ataatsimut piffissaq suliffigisaat sivitsorpoq, ataatsimullu akissarsiat qaffariarput, sunniutaali piffissap ilaannaani atuuppoq ukiullu ataatsip miss. qaangiunnerani annikiliartoqqipput. Tamatuma peqatigisaanik nalinginnaasumik piffissaq suliffigisaat sivikilleqqippoq, tamatumaniilu ilaatigut nalinginnaasumik sulinnermut taarsiullugu fleximik sulilerput.	Paasissutissat pissarsiarineqarsinnaasut pissutigalugit 2015-2019-imi taamaallaat akunnittarfiutillinnut neriniartarfiutillinnullu misissueqqissaartoqarsimavoq. Naatsorsueriaaseq difference-in-difference atorlugu sunniutinik nalilersuisoqarpoq, sulisartut 2017-imi fleximik suliffeqalerlut 2019-imilu fleximik suliffeqalerlut imminnut saniliunniarlugit misissuisoqarpoq. <i>Rekenhof (Revisionsretten) & Federaal Planbureau (2026): Analysis of the Flexi-Job Scheme, forelagt Det Nationale Arbejdsråd (NAR/CNT) januar 2026.</i>

Apeqquut 5) Naalakkersuisut nassuiaateqarsinnaappat, sulinermit isertitat ilassutaasut nalinginnaasumik sulinermit isertitanit oqinnerusumik akileraaruserneqartalernissaannik aaqqissuussinerup atuutilersinnissaanut inatsisitigut suut allanngortinneqartariaqassanersut?

Saniatigut sulinermit isertitat akileraaruserneqarnerat nalinginnaasumik sulinermit isertitat akileraaruserneqarnerannit oqilisaassiffiqeqarnerussappata Aningaasarsianit isertitat pillugit Inatsisartut inatsisaat aamma Akileraaruserinermik ingerlatsineq pillugu Inatsisartut inatsisaat kiisalu nalunaarutit allanngortinneqartariaqassapput. Immikkoortut inatsisini qitiusut tullinnguuttumi allasimapput.

Siullertut taaguut saniatigut sulinermit isertitat imaluunniit qaangiuttoorluni sulineq inatsisini nassuiarneqassapput aamma nalinginnaasumik sulinermit isertitanit paatsuugassaangitsumik immikkoortillugit nassuiarneqassapput. Taamatut immikkoortitsinissaq pingaaruteqarpoq, tassami isertitat sorliit appasinnerusumik akileraaruserneqartassanersut nassuiaammi aalajangerneqartussaamat. Tassunga atatillugu appasinnerusumik akileraartinneqarnissaq anguniarlugu nalinginnaasumit isertitat saniatigut isertitatut nassuiarneqannginnissaasa pinaveersaarnissaat qitiulluinnarpoq. Tamanna malunnartumik aarlerinaataasoq, nunani allani aaqqissuussinerni assingusuni misilittakkani ersersinneqarpoq. Piumasaqaatit erseqqissut aalajangersarneqartussaassapput (ass. piffissaq suliffiusoq nalinginnaasoq qaangerlugu akunnerit suliffiusut, saniatigut suliffimmit isertitat il.il.)

Tamatuma kingorna nalunaarutiginninnermut malittarisassat naleqqussarneqartussaassapput. Sulisitsisut aamma Akileraartarnermut Aqutsisoqarfik siunissami saniatigut sulinermit isertitat nalinginnaasumik akissarsianit immikkoortillugit nalunaarsuisassallutillu nalunaarutiginnittassapput. Ullumikkut taakku isertitat nalunaarsorsimaffianni immikkoortinneqanngimmata nalunaarutiginninnermut malittarisassat allanngortinneqartariaqassapput, ass. siumut nalunaarsuisarnissaq pillugu systemimik kiisalu Akileraartarnermut Aqutsisoqarfiup it-systemiinik naleqqussaanissaq pisariaqassaaq.

Pingajuattut inummut ilanngaasut, ilanngaasut aalajangersimasooq, sulinermit ilanngaasut aamma isertitat apeqqutaallutik tapiissutit nalilersorneqassapput, taamaalluni aalajangersimasumut tunngatillugu oqilisaassiffiqeqarnermi tapiissutit allat sunnerneqannginniassammata.

Sisamaattut allatut nalunaarsuisoqarnissaa atornerluisoqarnissaalu pinaveersaarniarlugit nakkutilliinissamut atornerluisoqannginnissaanullu tunngatillugu malittarisassiortoqartussaassaaq.

Kiisalu ataatsimut isigalugu suliniutip ilusilersorneranut tunngatillugu matumani immikkut appasinnerusumik akileraartarnissamut assingusumilluunniit ilanngaateqarnissamut tunngatillugu politikikkut aalajangertoqartariaqassaaq. Tamatuma peqatigisaanik suliniummik aningaasaliinissaq isummerfigineqartussaassaaq. Siuliani allasimasutut ilisimatusarnikkut misissuineq tunngavigalugu aaqqissuussinerup tamatuma immiut akilersinnaanerani isummernissamut tunngavissaqanngilaq.

Inatsisitigut allannguutissat suut tunngaviatigut pisariaqartinneqassanersut qulaani allasimasuni nassuiarneqarnerat oqaatigineqassaaq. Allannguutit annertussusaat apeqqutaalluni ilusilersuisoqassaaq. Aaqqissuussinerit taamaattut pisortani


namminersortunilu malunnartumik allaffissornikkut aningaasartuuteqarnermik kiisalu IT-systeminik naleqqussaamissamut malunnartumik aningaasartuuteqarnermik kinguneqassasoq Aningaasaqarnermut Naalakkersuisoqarfimmit nalilerneqarpoq.

Eqikkarnera

Saniatigut sulinermit isertitat akileraaruserneqarnerisa oqilisaassiffigineqarnerat akileraarutitigut isertitat ikinnerulernerisigut kiisalu pisortani namminersortunilu allaffissornikkut malunnartumik aningaasartuuteqarnikkut qularnanngitsumik isertitassatut annaasaqartoqarnissaa eqikkarlugu nalilerneqarpoq, illuatungaani sulinissamut kajumissutsimut sunniutissatut naatsorsuutigineqartoq oqaatigiuminaappoq aamma nunani tamalaani misilittakkat malillugit tamanna killeqarpoq. Tamatuma peqatigisaanik taamatut aaqqissuussineq naleqqutinngitsumik pissusilersortoqarnissaanut assut aarlerinaateqarpoq, tassani isertitat saniatigut sulinermit isertitatut allatut nalunaarsorneqartalernissaat assut aarlerinaataalluni.

Tamanna tunngavigalugu saniatigut sulinermit isertitat akileraaruserneqarnerisa oqilisaassiffigineqarnissaat pillugu Naalakkersuisut maannakkut sulissutigissallugu pilersaaruteqanngillat.

Inussiarnersumik inuulluaqqusillunga



Aqqaaluaq B. Egede

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqquut:

1. Naalakkersuisut misissorsimavaat, sulinermit isertitat ilassutaasut akileraaruserneqarnerisa oqilisaaffigineqarnerat Kalaallit Nunaanni sulinissamut neqeroorutaasartunut qanoq sunniuteqassanersoq?
2. Sulinermit isertitat ilassutaasut nalinginnaasumik sulinermit isertitanit appasinnerusumik akileraaruserneqartalernissaannik aaqqissuussaqaqarnermi, akileraarutitigut isertitassat qanoq annaaneqartiginissaat Naalakkersuisunit nalilerneqarpa?
3. Naalakkersuisut naliliippat taamaattumik akileraarusiinnermut aaqqissuussineq pisortat namminersortullu sulisoqarniarnikkut amigartoornerannik annikillisaanermut iluaqutaasinnaasoq? Aappiuppat, qanoq ililluni?
4. Naalakkersuisut nunani allani imaluunniit namminersorlutik oqartussaaffilinni aaqqissuussinerit assingusut, sulinermit isertitat ilassutaasut imaluunniit suliffissamik sivitsuineq appasinnerusumik akileraaruserneqartarlutik, misissorlugit nalilersorsimavaat? Aappiuppat, qanoq misilittagaqarfigineqarpa?
5. Naalakkersuisut nassuiaateqarsinnaappat, sulinermit isertitat ilassutaasut nalinginnaasumik sulinermit isertitanit oqinnerusumik akileraaruserneqartalernissaannik aaqqissuussinerup atuutilersinnissaanut inatsisitigut suut allanngortinneqartariaqassanersoq?

(Inatsisartunut ilaasortaq Isak Johannesen, Naleraq)

Tunngavilersuut:

Kalaallit Nunaanni suliassaqaqfinni arlalinni sulisussaaleqineq annertoorujussuarmik unammillernartorsiortitsivoq. Peqatigitillugu innuttaasut ilaat suliffimminnik sivitsuinikkut imaluunniit saniatigut sulinikkut suli annerusumik sulerusupput.

Apeqquutit siunertaraat aaqqissuussinerup, nalinginnaasumik sulinerup saniatigut sulinissamut aningaasaqarnikkut kajumissuseqarnerulersitsisup, aningaasaqarnikkut, allaffissornikkut sulisullu pillugit kingunerisassai erseqqinnerusumik qulaajarneqarnissaat.



Apequtigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.